

欽
定
全
唐
文

欽定全唐文卷九十目錄

昭宗一

削奪陳敬瑄官爵制

削奪李罕之官爵制

貶張濬鄂岳觀察使制

貶孔緯荆南節度使制

貶杜讓能梧州刺史制

討董昌制

貶孫偓南州司馬制

昭雪杜讓能等制

授薛王知柔戶部尚書判鹽鐵度支制

授大理卿李垕黔中宣慰使制

授崔允崔遠平章事制

授孫偓判度支兼諸道鹽鐵使陸展判戶部制

立德王爲皇太子制

貶朱朴郴州司戶制

授太子賓客王牘諸王侍讀制

授崔允吏部尚書制

貶王搏工部侍郎制

貶王搏溪州刺史制

再貶王搏崖州司戶制

授樂仁規兵部尚書制

賜御史大夫史實制

特勅新進士授官制

封成汭上谷郡王制

授李踐由安州別駕李惟可鄂州別駕制

命皇太子監國制

欽定全唐文卷九十

昭宗皇帝

帝諱煜懿宗第七子咸通八年生十三年四月封壽王名傑乾符四年遙鎮幽州文德元年立爲皇太弟改名敏翌日即位改今名大順元年正月上尊號聖文睿德光武宏孝皇帝天祐元年朱全忠逼遷於洛陽遂被弑在位十六年年三十八諡曰聖穆景文孝皇帝廟號昭宗

削奪陳敬瑄官爵制

朕以賞罰二柄不可廢也助順誅逆自古行之陳敬瑄出

身屠沽驟竊旄鉞包藏奸逆侮慢朝廷敢行專殺之威尤
顯不臣之跡惡昭圖之直筆溺闕贍於中流傲狠之心惟
思殘害猖狂之志日甚沈迷先皇帝再幸梁洋方當艱否
廣張形勢欲脅乘輿全蜀賦租不共天府百城牧守皆出
私人近者爰命台臣往持戎律冀因交代亦許罷歸而又
結黨連羣以拒王命深溝高壘輒恣兵威罪既滔天誠宜
共棄其陳敬瑄在身官爵并宜削奪兒姪等委中書門下
商量處分

削奪李罕之官爵制

朕聞君天下者先賞而後罰立教化者貴德而賤刑其或
道之以爵而不勸是稟匪人之性豈悛不救之謀雖軍旅
屢興有慙區宇而干戈勿用何去頑嚚邢磁洺等州節度
觀察處置使金紫光祿大夫檢校司徒同中書門下平章
事守邢州刺史上柱國隴西郡王食邑三千戶李罕之間
閭下品窟穴微生憑厲氣以感時依凶徒而干紀剽劫郡
縣攘害蒸黎水絕安流陸無砥道先皇帝捨於斧鑕委以
招修唯聞屠伯之名寧有字人之稱而又擅離河內竊據
東郊谿壑貪心涸伊瀍而不潤烏鳶利觜啗郊鄆以成空

旋逃原野之誅還聚萑蒲之衆時以上京初復羣情未安
宥十死之正刑委三城之重地仍加相印俾耀兵權冀懷
再造之恩永戢無厭之暴而乃復招逋逸輒留貢輸始則
結王友遇而寇攘終則投李克用而侵軼且山北以邢洛
爲要害爾則引戎馬以屠攻洛京以懷孟爲咽喉爾則肆
爪牙而搏噬謂其當路終可欺天不知祖宗垂休祐予續
繼中外陳懇成我蕩平專攻之令纔行同德之捷已獻度
其鼎斧無一安存降以絲綸用彰攻伐其李罕之在身官
爵并宜削奪注毀委招討使宰臣張濬關駱全雍悉加存

恤嗚呼禍福無門惟人自召爾爲將相而不能全身爾授
旌旗而翻行起亂罪在冊府朕安敢私凡百同盟共懲始
禍布告中外咸使聞知

貶張濬鄂岳觀察使制

昔漢武因恭儉富庶之後建置朔方孫宏沮之十不得一
良史以宏有宰相之體誠以愛人理國爲先拓境開邊爲
末及孝宣帝值雄才削平之餘將議北伐魏相爭之五將
旋罷果致中興號爲賢輔況朕值天厭干戈之際人思休
息之時敢望臯夔共成堯日庶幾孫魏粗及漢年苟異於

斯知何倚注光祿大夫守尚書右僕射兼中書侍郎同中書門下平章事集賢殿大學士判度支兼京畿諸道營田修葺太廟使充河東諸道行營兵馬招討指揮制置等使河東節度觀察處置等使上柱國河間郡開國公食邑三千戶食實封二百戶張濬早以盛名稱爲奇士由是再加召用委以鈞衡謂其必致小康克勝大任而乃罔思守道但欲邀功是不詢之計謀起無名之兵甲自云一舉止在旬時妄請抗論勢莫能奪輕葛亮渭濱之役小裴度淮右之行而經歷寒暄糜費百萬虛誕彰於朝野詐詭布於華

夷橫草薶開燎原愈急俾擁旄乘驛之使囚於虜庭致勤
王奉國之軍懷歸本土忘廊廟之威重結藩屏之寇讎是
使海內生靈竭於貢賦豈獨河中郡邑蕩爲邱墟生此厲
階欲誰歸咎嗚呼徵晁錯之故事仍王恢之舊章固有明
文爾當何道尚以愛人以禮理體宜然廉鎮極權武昌善
地宜罷樞軸之任仍停支度之司勉自深惟以逃後命可
檢校尚書右僕射充鄂岳等州都團練觀察等使

貶孔緯荆南節度使制

朕垂衣嚮明負展成化內則委輔翼之任外則寄藩屏之

臣比用股肱是爲心膂況荆衡巨屏禹貢古封南制百蠻
西控三蜀或受統臨之命爰崇迭處之榮持危啟運保乂
功臣開府儀同三司守太保兼門下侍郎同中書門下平
章事國子祭酒充太清宮使宏文館大學士延資庫使諸
道鹽鐵轉運等使上柱國魯國公食邑四千戶食實封五
百戶孔緯闕里傳宗儒林植操出入累更於華貫超升遂
陟於鼎司宜成我無爲歌我有截豈可但崇朋助罕究否
臧昨者張濬首請興師親求伐叛且陳謀畫累贊征行決
言旬朔之間克著殊常之效延英互奏幾宜朕言文字繼

來固違朕志以至干戈一舉星紀將周并汾之寇孽未除
蒲晉之生靈已盡構茲紛擾職爾披陳罔思惑亂之由堅
執比周之計詢於輿論曷副簡求今則止罷中樞俾安外
閫尚顧始終之念用成進退之宜勉服明恩往祗休命可
檢校太保兼御史大夫荆南節度觀察使

貶杜讓能梧州刺史制

輔弼之事安危所屬大則調陰陽以期昭泰次則撫夷夏
以務洽平俾比屋之可封致乃后於無事兆人允賴百辟
具瞻苟異於斯則將安用扶危啟運保乂功臣開府儀同

三司守太尉兼門下侍郎同中書門下平章事充太清宮
使宏文館大學士延資庫使兼諸道鹽鐵轉運等使上柱
國晉國公杜讓能軒裳貴胄禮樂清門蹈姬孔之康莊邁
韋平之閎閱夙推重望早歷華資洎陟台司亟更年籥方
謂偉儒克承大任而乃首居帷幄輕議干戈棄卿士之臧
謀構藩垣之深釁啟詢之際證執彌堅果致兵集旬畿人
散都邑尚賴祖宗垂祐賢智叶謀頓悟朕心別施制命詢
彼輿人之論咸推上相之尤須示典章用息騰沸尚居列
郡式重大臣可貶梧州刺史

討董昌制

夫雷霆雪霜上天降以成物明罰勅法哲王垂以理人是則陽春不可以獨爲歲功仁恕不可以專爲君德刑威之作其在斯乎朕以眇身祗膺大寶奉祖宗之不訓荷天地之洪休八年於茲一日無怠遜於志者必本於情苟懲誠之不明懼典章之斯廢威勝軍節度使檢校太尉同中書門下平章事隴西郡王董昌出於行伍屬遇艱難權握兵戎位崇將相器將盈而自覆鼎必折而遂傾因憑生祠輒有狂計假陳妖異惑亂邪巫鼓噪危樓僞爲建國不思理

代徒生犬吠之音欲就叢祠妄舉狐鳴之兆賴浙西節度使錢鏐與諸州等皆忠誠憤激壯志堅高始以逆順之理飛章諭之而不悟次以攻伐之謀與約脅之而不迴至於率兵直以廟壘雖假言誘惑止遏凶邪終爲閉壁偷安不使束身歸罪是其陰詐猶欲張皇魚戲鼎而雖亦可哀螻怒轍而終爲不率天討有罪鬼得而誅其董昌在身官爵并宜削奪仍委錢鏐進兵攻討越城之內士庶且多寧無勇敢之徒善以功名自許如梟戮生擒董昌者授三品正員官賞錢一萬貫如有官者超三資酬獎如是董昌威制

曾助妖謀翻然改過圖功轉禍爲福有所自效者罪並不問賞即與之於戲惡殺好生人君令德仗順伐逆武夫令猷鳴鼓而攻蓋非獲已奮戈而起亦宜憤諸勿發勿焚無誤無失罔俾觀聽者謂我黷武而佳兵也

貶孫偓南州司馬制

金紫光祿大夫守禮部尚書安樂郡開國侯食邑一千戶孫偓夙通朝籍累踐華資竊顧多岐遽墮直道秉弼諧之大政附伎術之小人罔畏公言自爲良策處嫌疑而不愧謂寵利之可安而屬我艱危匪能匡救頃因丕變亦貸彝

章雖罷萬機尚分六職是惟循省俾息沸騰觀諫臣所上之章陳取戾不已之狀則正卿之位非爾宜居將儆後來遂投荒服行當罪已無或尤人可貶南州司馬員外置同正員仍令所在馳驛發遣

昭雪杜讓能等制

節文

其有任崇柱石位重台衡或委以軍權或參諸宥密竟因連謗終至禍名鬱我好生嗟乎強死應大順已來有非罪而加削奪者並復官資其杜讓能西門君遂李周潼已下並與昭雪還其爵秩韋昭度頃處台司每伸相業王行瑜

求尚書令獨能抑之致於沈寃諒由此事李磻文章宏瞻
迴出輩流竟以朋黨之間擠於死地凡在有識孰不咨嗟
宜並與昭洗仍復官爵

授薛王知柔戶部尚書判鹽鐵度支制

國家自盜螫中原兵纏九縣支度牢籠之務施張經制之
宜率煩台臣旁綜使務綱條既正豐阜可期宜擇通才俾
繼成績僉曰叔父膺予簡求詢謀協同毗賴惟允即以虛
位并而授之匪私吾宗示張王室惟爾嗣薛王知柔我之
近屬國之材人識大體以立朝蘊嘉謀而致用粵自典司

宗祐尹正神臯庇本枝而敦序有倫臨帝甸而污萊盡闢
政惟務本生靈懷衣食之源令著先威豪右屏椎埋之迹
人懷其惠吏不敢欺封畿新轉置之規園寢備薦羞之禮
府署完葺京師底寧疇茲多能孰可加爾朕言念銅鹽之
重賦輿之殷勞於鈞衡多歷年所今將授爾用展其材矧
乃司存此專郎吏乾元多難方委公卿離之合之各繫緩
急今我用爾思復舊章惟簡身可以律人惟奉公可以御
下取舍勿因於利任使惟其所知無以公務結私恩無以
公方樹私怨惟是六者竭乃一心副吾超拔之恩濟我艱

難之運悉仍舊貫別示殊恩於戲朝廷之本軍國之用佇爾康濟紓吾焦勞往佩寵光勉施才術苟不稱是又何敢以叔父私於天下哉

授大理卿李垌黔中宣慰使制

將我詔命使於四方必惟其人矧乃舊服咨於輔相僉曰汝諧用之不疑行矣思濟李垌國朝名相之令嗣也文行器業雅有家風政事規爲克紹先志踐履亟更於中外練達深得其本根頃鎮黔江洽聞善政四年問俗五郡懷仁恩信被於昆夷盛名振於縣道尋移旌蓋往理桂林載揚

休聲屢著嘉績兩地遺愛萬人去思今聞黔巫易帥之時
頗失睦隣之道慮成間隙又動干戈念遠俗之無辜向中
宵而不寐昇爾揆路爲吾使星尚念漢地人情必懷龔遂
河內風俗未忘寇恂宜其宣我憂勤導予宵旰強者抑之
弱者撫之無俾黔人又墮塗炭用爾專達膺予簡求佇其
嚮風聞爾稱職殊恩好爵無所恡焉

授崔允崔遠平章事制

門下擇股肱良臣爲社稷大計斯實安危之本必資經濟
之才應星象而踐三台平陰陽而調六氣成彼非熊之兆

叶茲審象之求旣偶通賢爰申並命扶危匡國致理功臣
新授武定軍節度湖南管内觀察處置等使金紫光祿大
夫檢校禮部尚書同中書門下平章事持節都督潭州諸
軍事兼潭州刺史上柱國清河郡開國侯食邑一千戶崔
允公台貴胄禮樂名門秉直道以匡時挺貞觀以華國玉
山孤峭迴出千峯冰鏡澄明能涵萬象翰林學士承旨銀
青光祿大夫行尚書兵部侍郎知制誥上柱國博陵縣開
國男食邑三百戶崔遠珪璋蘊德鸞鶴呈姿持偉望以標
奇蘊神鋒而匿耀朱絃逸韻旣可禮天寶劒雄銛宜乎折

滯或繼膺倚注屢執鈞衡或亟處深嚴嘗司詔誥變調茂
績敏嘿嘉名昭布朝倫洋溢休稱而體國勵志問牛之美
早傳致君載誠吐鳳之名夙著宜陟重任詳觀厥能升諸
喉舌之司寵以鑪錘之用專祕殿之圖籍度會府之財征
俾操化鈞仍綰邦職當此艱難之運爰繫輔弼之功噫未
復神州尚茲多壘仍歲有征巡之役兆人懷蘇息之期予
心浩然罔知克濟咨爾良弼共成懿圖勉膺三事之榮恪
奉一時之寵允可守中書侍郎兼戶部尚書同中書門下
平章事集賢殿大學士判度支遠可守本官同中書門下

平章事判戶部散官勲封如故

授孫偓判度支兼諸道鹽鐵使陸扆判戶部制

門下朕聞天所以運行不息維之者星辰地所以載厚無疆紀之者海岳故尹說相殷而帝道盛旦奭佐周而王業昌時之替興事繫輔弼朕勵精理道夢卜披賢繼叶旁求並膺爰立皆號人傑實爲國華銀青光祿大夫守中書侍郎同中書門下平章事充集賢殿大學士判戶部事上柱國安樂縣開國子食邑五百戶孫偓大昴分輝維嵩孕秀直如金矢潔若冰壺處諫諍之司言無畏忌守駁正之任

道不依違當官而行遇事必立自擢居台席兼領地征蘊
持危扶傾之心負憂國忘家之志卓爾孤邁超然不羣稽
於衆多僉曰名相銀青光祿大夫行尚書戶部侍郎同中
書門下平章事上柱國嘉興縣開國男食邑三百戶陸扆
清廟升歌朱干象舞內健外順動直靜專早踐清華旁流
休問旣登禁密潤暢皇猷言有準繩心無吝悔爰從近侍
委以化鈞目無全牛刃有餘地不斯須而離道不造次以
違仁考於羣詞咸稱良輔而皆道符夔益業冠蕭曹楷式
一時儀刑四海和松磊落鬱爲大廈之材賜璉晶瑩宛是

接神之器今朕以運丁艱否時未洽平賊臣尚恐其跳梁
國計未臻於豐羨煮海之利多失於舊規量地之征未登
於貢式須分重務屬我名臣冀大振於頽綱俾漸昌於衰
厯是用遷皇極紫微之位總簡書刊集之司兼以利權盡
付全德爾宜振提百度蕩定九圍勉服寵光以綏夷夏俛
可門下侍郎同中書門下平章事監修國史判度支兼諸
道鹽鐵轉運使扈可中書門下平章事中書侍郎充集賢
殿大學士判戶部事散官勲封如故

立德王爲皇太子制

我國家尚法夏殷遠遵漢魏爰設儲貳式固宗祧旣明兩
而作離在立嫡而惟長矧茲冲眇獲嗣丕基將宏永圖宜
舉令典德王祐朕之元子孝敬日躋早茂溫文克將岐嶷
屬者朝廷多故兵革尚興懷柔方務於舞干典禮未行於
主器而忠臣獻議百辟上言請建元良至於三四以奉祖
宗之彝教必在前星係億兆之人心宜崇嗣體由是考彼
史冊詢於著龜厥惟舊章乃建嘉命爾其嚴奉師傳敬慎
威儀必使流慶萬邦垂芳三善稟教諭之道作圖牒之祥
勿怠令猷克光帝載服我明訓永孚於休可冊爲皇太子

仍改名裕令所司擇日備禮冊命

貶朱朴郴州司戶制

夔州司馬員外置同正員朱朴本在寒微偶升科第復塵
簪組且列膠庠不爲自審之謀但務夤緣之計實因姦幸
潛致顯榮亦謂術可弭兵學能理國叨半歲容身之貴無
一朝輔政之功惟辱中台頗興羣論斥於散外未絕他腸
越法制以有圖信愆尤之自作封章所指竄逐尚輕掾彼
方州亦云寬典非我好黜惟爾深思可貶郴州司戶參軍

授太子賓客王牘諸王侍讀制

王者之子在襁褓中置三師訓之繇古道也我思成人已
來邁此多難師訓之義翦焉闕聞南面稱尊愧於寡昧繇
是言念諸子疚於厥心宜擇正人爲之傳導今丞相言爾
牘老於大學雅有德行明君臣父子之道知禮樂詩書之
源可使高步承華大參望苑琢磨羽翼朕有冀焉爰授正
卿以加峻級且旌優異往爲傳師邪蒿鮑魚勿俾登俎胄
筵講肄爲惜分陰使其知東平爲善之規喜王褒洞簫之
賦承萬代之業固磐石之基斯實賴於老成人也

授崔允吏部尚書制

門下天地廣運寒暑所以推遷帝王任人理亂係於周稔
故叔敖三相往道闕胡廣七爲前功斯在因詳文冊爰示
徽章扶危匡國致理功臣光祿大夫守中書侍郎兼吏部
尚書同中書門下平章事判度支上柱國清河郡開國公
食邑二千戶崔允金莖擢用玉燭資和朱絃含理代之音
蒼璧是禮天之器自付政柄累遇時艱或已去而復還每
勤官而莅事雖務直道終失中庸朕昨者初復上京方安
庶品且期靜理貴保和光而於敷奏之間獨有去留之說
徒妨事體俾長紛爭是用輟乃鈞衡專茲銓鏡亦將示朝

金定全唐書卷一百一十一
廷之典制保君臣之始終更茂前功永孚於道可守吏部
尚書

貶王搏工部侍郎制

天地之數寒暑有推遷輔弼之臣任用有進退蓋以其宣
力斯久克修是虧俾夫退列貳卿式示朝典以禮之使其
在茲乎扶危匡國致理功臣開府儀同三司守司空兼門
下侍郎同中書門下平章事監修國史判度支上柱國魯
國公食邑三千戶食實封一百戶王搏始以菲才擢升重
位亟移星律蔑效公忠惟務回邪罔思致正紊朝廷之綱

紀致經費之空虛而又朋附近臣驟弛大典豈可尚持國柄所宜降處周行猶念含宏勉爲循省可特進尚書工部侍郎

貶王搏溪州刺史制

工部侍郎王搏久司邦計復掌國鈞致帑藏之不豐則材謀而安在曾無謹正但務回邪盡非變理之心惟是貪婪之志今則罷其大柄復列貳卿雖優宏之制已行在問俗之司俾任可謫授溪州刺史所在馳驛發遣

再貶王搏崖州司戶制

溪州刺史王搏久居重位罔著嘉猷掌邦計而罕致豐盈顧私室而惟多貪積雖示朝黜未塞羣情俾從行使之權許履掾曹之職可貶崖州司戶參軍員外置同正員

授樂仁規兵部尚書制

兵部司馬之職尚書法從之官古不輕授今難其人蓋戎務之出入馬政之弛張莫不攸繫非有奮勵之材練達之智不足以奉揚威武毗贊機密者矣爾光祿大夫兵部尚書樂仁規粵自蚤歲有志事功自北而南在朕左右及其給事內廷論思獻替之益亦時有焉夏官之選唯爾之能

然以八座之官朕非輕以畀人者也爾尚一乃心力以報朕所以見知之意於戲惟秉義守禮則可以謹科條惟趨事赴功則可以行邦正尚思自勉服我訓詞

賜御史大夫史實制

古置御史繩愆糾察爲朕耳目董正朝綱厥任非輕必惟其人爾御史大夫史實風裁嚴毅學識淵源勁正之氣足以配昔人之賢明敏之才足以周當世之務今朕丕承鴻緒值造多艱外有侵侮之虞內賴修攘之略特簡命爾爾宜益勵初心毋荒朕命

特勅新進士授官制

念爾登科之際當予反正之年宜降異恩各膺寵命

封成汭上谷郡王制

門下朕聞賞有功則勞者勸考其績則政事彰能否旣分
黜陟斯在其有勲已銘於簡冊化復被於謳謠表率公侯
澄清土宇靜夢澤於千里盡闢汙萊曜軫宿於九霄光生
芒角行爵繼祿顯忠遂良式副僉諧爰登寵寄具官成汭
氣合冬日志烈秋霜蘊雄特之標中能抑畏抱介潔之操
外富通明自節制衡巫統臨荆楚承匪人之貪虐屬生聚

之流離比衛文之革車兼無三百同魏相之版戶略不盈
千曾未踰時俄成樂國井閭富庶人物殷繁璣組之賦聿
修苞茅之貢常入柶丹靡闕箇簠咸臻睦隣而四境風行
蕩寇而三峽浪息沉蔓聯湖嶺輻湊梯航既水陸之靡艱
致賦輸之罔滯積茲功緒實謂忠勞苟無舉善之文是廢
疇庸之典今則移紫微之尊秩疏異姓之殊封位冠三台
爵踰五等用獎分憂之績乃申進律之恩勉力在公傾心
報國服我休命無忘恪恭

授李踐由安州別駕李惟可鄂州別駕制

門下朝議大夫前使持節房州諸軍事守房州刺史上輕
車都尉李踐由朝議大夫行蘄州司馬護軍李惟可等出
自士林頻遷官序或方圓異用道有變通或昆友官同法
宜迴避俾從新令用協舊章踐由可守安州都督府別駕
散官如故惟可可鄂州別駕官勲如故

命皇太子監國制

門下朕以眇身祗膺大寶十有三載懼不克勝上荷祖宗
之靈托於兆人之上虛受謙益每勵於恭勤示儉守文靡
忘其宵旰而乃兩經播越屢興兵革生類莫躋於仁壽理

道未致於洽平尚賴左右大臣尊獎侯伯共戡多難歸復
神州豈我眇沖拯此艱運恭念高祖睿宗元宗順宗或經
多難或苦沈疴遂厭萬幾授於令嗣是使進退無爽孝慈
兩全人心盡服其至公天性克彰於具美近者忽嬰疾疹
旦夕未瘳雖思養襟靈而亦循典故皇太子裕溫恭有立
和粹積中蘊孝悌以闕稟聰知而夙賦動惟樂義進則思
賢必能廣繼絕之心副傳歸之命萬機至重不可暫闕宜
令皇太子裕監軍國事咨爾中外匡弼將相卿士輔朕元
子永孚於休凡有庶務悉宜聽監國處分布告遐邇當體

朕意主者施行

欽定全唐文卷九十一目錄

新文藝出版社藏書

昭宗二

修葺國學詔

復陳敬瑄官爵詔

誅杜讓能宣示天下詔

賜李克用詔

答李克用請車駕還宮詔

賜邠州行營都統詔

誅崔昭緯詔

答韓建表請車駕幸華州詔

賜韓建詔

答韓建讓封昌黎郡王詔

答韓建讓兼輔國軍節度使長春宮使詔

貶崔允工部尚書詔

誅宦官詔

賜王建詔

賜王建詔

遺詔

授張實段逸兼御史中丞勅

賜錢鏐勅

賜錢鏐安衆營額勅

平楊守亮等勅

答錢鏐奏進安衆營圖勅

賜新及第進士勅

覆試進士勅

貶崔凝合州刺史勅

升華州爲興德府勅

賜鎮東軍押衙樂仁厚勅

答錢鏐奏重修天柱觀勅

誅王搏勅

欽定全唐文卷九十一

昭宗二

修葺國學詔

有國之規無先學校理官之要莫尚儒宗故前王設塾庠
陳齒胄所以敷揚至道宏闡大猷者也國學自朝廷喪亂
已來棟宇摧殘之後歲月斯久榛蕪可知宜令諸道觀察
使刺史與賓幕州縣文吏等同於俸料內量力分抽以助
修葺

復陳敬瑄官爵詔

大海所以長百川者下流必納大地所以載萬物者有質
皆容哲后體之事無常勢弔人拯溺則龔發王師錄舊棄
瑕則大開法網斷自朕志又何愧焉陳敬瑄發跡禁軍遂
居大鎮因緣遭遇窮極寵榮先皇帝頃屬艱難遂至巡狩
敬瑄當鎮都會頗罄忠誠大則有天下赴難之師皆求宿
衛次則有官司奔走之吏重創朝廷玉帛波輸梯航露集
實竭勇智備極經營度支日費而未省告勞供饋星煩而
竟無橫斂全由盡節果叶中興朕初奉宗祧未熟政理遽
忘前績俄至興師責楚子之包茅爾雖曠職忘公孫之豆

粥予亦無恩致我勞臣莫明素志近者視朝無事乙夜觀書則盧綰之在四夷尚堅宿衛周勃之居一縣足表厚誣前史具存殷鑒何遠矧朕冲眇敢忘勲勞相印兵符高爵顯位既從昭雪寵宜如初勉思禍福之門重契君臣之分抑人情而遵天道既已無疑思福善而誠禍盈便當自省王建顧彥朗等久屯師旅頗罄忠勤盡懷頗牧之謀俱奉及瓜之戍眷言勲效常所歎嘉今則大布寬仁永安誚誤在臬垂橐之令勿辜偃革之恩便令部領師徒各歸所任其迴戈將士等仰彥朗王建以奉本道上供錢物量事優

賞訖奏兼聞楊晟等深知逆順首率歸投陳勤草之心備
輿櫬之禮書之信史永播忠規敬瑄重作藩侯列牧復爲
州將勉思和叶以保初終無構厲階重貽伊戚敬瑄可開
府儀同三司太師兼中書令成都尹上柱國潁川郡王食
邑四千戶食實封八百戶充劔南西川節度副大使知節
度事管内觀察處置統押近界諸蠻及西山八國雲南安
撫制置營田供軍糧料等使於戲刻舟求劔取笑古人膠
柱調瑟故難忘理茲以通變冀息干戈苟有利於蒼生又
何辭乎改作布告遐邇咸使聞知

誅杜讓能宣示天下詔

夫賞有功而刑有罪饗國明規邪務去而任無私君人大節其有顯犯典憲謀危宗祧難貸大刑式謝四海崖州流人李周潼驩州流人段訥儋州流人西門君遂雷州司戶參軍杜讓能等結爲奸黨請發禁軍假言防託山南心乃攻伐近鎮傾危宗社讒構忠良包藏禍心附會狂計昊穹降監宗廟炳靈大臣繼有封章列藩瀝懇論奏朕親鞫問罪狀顯然須行憲章諒非獲已於戲朕以冲眇嗣膺丕圖任用之間固無疑事而讓能一居台鼎八換星霜必謂能

罄忠誠不辜所仗殊不知手操國柄身作亂階政以賄行
化由財進舉枉錯直愛憎繫於一時鬻爵賣官聚斂逾於
巨萬仍復舉倍息之利恣兼并之心市肆貨財曰歸私第
隣伍店宅旋入所居政事決於胥吏奢華縱於婦女邱某
一家杖殺曾不奏聞湖外二年兵戈曾闕敗闕或以闕益
藏或以狂誤交通朕以久務含宏未能決謫一旦彰露萬
口咨嗟君遂等始終同謀表裏相濟納貨則更相問遺謀
人即放還闕至於烟塵四郊紛被九陌擁兵而固請巡幸
差人而縱火官中頃刻之間警蹕無禁綴旒累卵未足爲

危四罪既誅中禁立定國法斯在朕何敢私尚慮道途傳聞遠近誤謬四海之內未委事端故降命書明示天下凡在臣庶宜體朕懷

賜李克用詔

朕以景宣全瓘行實繼鵬爲表裏之奸謀縱干戈於雙闕烟塵倏忽劫殺縱橫朕偶脫鋒鏑遂移輦輅所爲巡幸止在近郊蓋知卿統領雄師駐臨蒲坂累飛書詔繼遣使人期卿以社稷爲憂君親在念必思響應速議龔行豈謂將涉兩旬未有來表憂虞是切寢食不遑豈忠義不切疚懷

金史卷之五
而道途或有阻滯今則專令親信懇託勲賢故遣延王戒
丕丹王允與供奉官王魯紆等宣示卿宜便董貌貅徑臨
邠鳳蕩平妖穴以拯阽危是所望也

答李克用請車駕還宮詔

昨延王迴言卿憂時體國執禮輸忠接遇之間周旋盡節
備知肺腑識我恩榮靜惟尊主之心果契知臣之分朕欲
取今月二十四日卻復都城冀寧兆庶倚我勲德有若長
城速伸翦盪之謀以慰黔黎之望

賜邠州行營都統詔

邠州節度副使崔鋌破城之時勿令漏網鋌與崔昭緯去年朋黨交結王行瑜構合禍胎原繇此賊付四面行營知悉

誅崔昭緯詔

朕猥以眇身恭臨大寶修前王之法度奉列聖之紀綱未嘗以喜怒之心行其賞罰唯務以誠信之道示於寰區有功有勞既不愆於爵祿負恩負法寧可貸其誅夷是謂至公庶臻理道左降官崔昭緯頃居內署粗著微勞擢於侍從之司委以變調之任不能忠貞報國端慎處身潛交結

於姦臣致漏泄於機事星霜累換匡輔蔑聞其罪一也又
使其私忿輒恣陰謀託崔鉦之險熾連行瑜之計畫遂至
稱兵向闕怙衆脅君故宰臣韋昭度李谿並以無辜見害
幾危宗社顯辱君親其罪二也及行瑜敗滅京國甫安而
乃自懼欺誣別謀託附又於藩閫潛請薦論不唯苟免罪
愆兼亦再希任用貪榮冒寵僭濫無厭敗俗傷風賢愚共
鄙其罪三也又將厚賂欲結諸王輕侮我憲章玷瀆我骨
肉貨財之數文字具存賴諸王作朕腹心嫉其蠹害盡將
昭緯情款兼其親吏姓名直具奏聞拒其求託昭緯曾居

宰輔久歷清崇但欲逞其回邪都不顧其事體觀其識見
實駭聽聞其罪四也自姦邪既露情狀難容尚示寬恩未
行嚴憲投於荒裔冀其自新而不能退省過尤恭承制命
速赴貶所用守常規而猶自務宴安尋聞所在留駐攪擾
藩鎮侮慢朝章曾無懷畏之心可驗包藏之計罔知懲咎
唯謗朝廷其罪五也朕以恩澤者帝王之雨露刑法者邦
國之雷霆無雨露則庶物不榮無雷霆則萬邦不肅體天
道以化育遵王度以澄清罪既昭彰理難含垢凡百多士
宜體予懷其崔昭緯宜差使往所在賜自盡

答韓建表請車駕幸華州詔

鎮國軍節度使韓建忠貫雪霜義堅金石十陳章表備竭
憂國之誠一詣行宮愈驗愛君之志況華州城壘牢固糧
儲贍豐兵士又免遠行車輿且絕他慮

賜韓建詔

卿武抱七德瑞應四靈挺生德門佐我不祚綵衣就養深
知百行之原布被奉家不以三公之貴朕聞卿高節獎卿
崇勲遷幸已來社稷是託卿宜每關朝政莫惜揣摩旣位
列大臣亦不爲越分至於道路警候晨夜隄防皆佇良籌

用致高枕無令奔軼以慰焦勞諸道節度使知卿至忠服卿威望卿宜各移書檄告以安危使有兵者陳勤王赴難之謀豐財者展急病上供之效合成忠孝同濟艱難啟我中興允屬上將山河爲誓不在他人

答韓建讓封昌黎郡王詔

卿始以勤儉鎮關輔爲列嶽準繩近以忠赤扈和鑾立大朝綱紀誠恪備盡豐省中規下有慰於孝思上無累於供億創行廟之功也羣后在廷盛典咸舉復累朝之廢墜崇萬代之本根建儲宮之效也而又請散兵甲大斥奸邪忠

言屢聞成績可數以身許國其心動天雖仲尼興微管之言漢祖有必勃之謂方用經濟殊曰寂寥永言茂恩詎非異數但念成人之美君子所先執德不回格言斯尚是用寢美號重封之澤就謙光崇讓之規足以警勵貪夫教化疲俗已議依允尤切歎嘉

答韓建讓兼輔國軍節度使長春宮使詔

卿才本濟時道惟師古致君不欺於辱市憂國每至於忘家自朕薄狩近關倏踰周歲備見忠勤之效莫非傾盡之心允謂良臣宜膺重寄會同州元戎失職軍旅不安況接

行朝尤思得帥是用資爾兼領鎮乎危邦冀疲瘵之漸蘇而烟塵之徹警何乃遽陳章表過有撓冲方藉當仁豈宜多讓固難依允無至再三

貶崔允工部尚書詔

食君之祿合務於盡忠秉國之鈞宜思於致理其有疊膺異渥繼執重權遽萌狂悖之心忽構傾危之計人知不可天固難容扶危定亂致理功臣開府儀同三司守司空兼門下侍郎同平章事充太清宮使宏文館大學士延資庫使諸道鹽鐵轉運等使判度支上柱國魏國公食邑五千

戶崔允奕葉公台蟬聯珪組冠歲名升於甲乙壯年位列
於公卿趣向有聞行藏可尚朕採於羣議詢彼輿情有冀
小康遂登大用殊不知漏卮難滿小器易盈曾無報國之
心但作危邦之計四居極位一無可稱豈有都城合聚兵
甲暗養死士將亂國經聚貔武以保其一坊致刁斗遠連
於右輔始則將京兆府官錢委元規召卒後則用度支使
權利令陳班聚兵事去公朝權歸私室百辟休戚由其顧
盼之間四方是非繫彼指呼之際令狐渙姦織有素操守
無堪用作腹心共張聲勢遂令濫居深密日在禁闈罔惑

朕躬僞行書詔致茲播越職爾之由豈有權重位崇恩深
獎厚曾無惕厲轉恣睢盱顯構外兵將圖不軌朕以士庶
流散兵革繁多遂命宰臣與之商議五降內使一貢表章
堅臥不來拒召如此況又拘留庶吏廢闕晨趨人旣奔驚
朕須巡幸果見兵纏輦轂火照宮闈烟塵漲天干戈匝野
致朕奔迫及於岐陽翠輦未安鐵騎旋至圍逼行在焚燒
屋廬覩此阡危咎將誰執近省全忠章表兼遣幕吏敷陳
言宰臣繼飛密緘促其兵士西上靜詳構扇孰測包藏無
功及人爲國生事於戲君人之道委之宰衡庶務殷繁豈

能親理盡將機事付爾主張負我何多構亂至此仍存大體不謂無恩可責授朝散大夫守工部尚書

誅宦官詔

宦官之興肇於秦漢趙高閹樂竟滅嬴宗張讓段珪遂傾劉祚肆其志則國必受禍悟其事則運可延長朕所以斷在不疑祈天永命者也先皇帝嗣位之始年在幼沖羣賢相推奄專大政於是毒流宇內兵起山東遷幸三川幾淪神器迴鑾之始率土思安而田令孜妒能忌功遷搖近鎮陳倉播越患難相仍洎朕纂承益相侮慢復恭重遂逞其

禍道弼季述繼其凶幽辱朕躬凌脅孺子天復返正罪已
求安兩軍內樞一切假借韓全誨等每懷憤惋曾務報讐
視將相若血仇輕君上如木偶未周星歲竟致播遷及在
岐陽過於羈紲上憂宗社傾墜下痛人庶流離茫然孤居
無所控告全忠位兼二柄深識朕心駐兵近及於三年獨
斷方誅於元惡今謝罪郊廟即宅宮闈正刑當在於事初
除惡宜絕其根本先朝及朕五致播遷王畿之吐滅耗太
半父不能庇子夫不能妻室言念於茲痛深骨髓其誰之
罪爾輩之由帝王之爲治也內有宰輔卿士外有藩翰大

臣豈可令刑餘之人參預大政況此輩皆朕之家臣也比
於人臣之家則奴隸之流恣橫如此罪惡貫盈天命誅之
罪豈能捨橫屍伏法固不足矜含容久之亦所多愧其第
五可範已下宜並賜死其在畿甸同華河中並盡底處置
訖諸道監軍使已下及管內經過并居停內使勅到並仰
隨處誅夷訖聞奏已令準國朝故事量留三十人各賜黃
絹衫一領以備宮內指使仍不得輒有養男其左右神策
軍並令停廢

賜王建詔

朕以眇身託於人上皇天不佑寇難薦興外無桓文內無平勃每一念至芒刺在懷卿忠義貫日至誠許國三川不寧一麾已定清淨中原再造我國家朕有望於卿也

賜王建詔

朕去年在鳳翔與茂貞熟計誅韓全誨等以謝全忠崔允固請廢兩軍盡去北司朕止欲誅有罪之人全忠允必欲盡殺朕方危迫不得不從而允與鄭元規朋助全忠間譖誘惑欲起兵收鳳翔次及西川天人助順崔鄭就誅昨正月二十日朕御樓撫慰軍氓具告允等罪狀宰臣裴樞等

受全忠密旨亟奏鳳翔川軍已及咸陽脅朕遷洛後二日東兵擁朕出長安朕與后妃宗室吏人匍匐就道艱苦萬狀六軍偕廢朕益孤危再賜茂貞密詔使告卿糾合諸鎮共迎朕西歸偵知全忠遷朕至洛盡斥內外侍衛雖有書詔不可復通藩鎮諸侯或信僞詔彊者歸之則賊勢轉盛卿自先帝時立功數助朕征討受賊誣構寧不冤憤計此賊必先討鳳翔次及卿與河東然後取天下卿安忍負高祖太宗三百年德澤而束手黃巢餘黨宜亟告茂貞繼徵克用行密及襄幽鎮魏同舉勤王之師迎朕還京朕兵盡

力窮危及宗社臨軒西望灑血告卿

遺詔

我國家化隋爲唐奄有天下三百年之盛業十八葉之耿
光朕自纘丕圖垂將二紀雖恭勤無怠屬運數多艱致寰
宇之未寧覩兵戈之屢起賴勲賢協力宗社再安豈意宮
闈之間禍亂忽作昭儀李漸榮河東夫人裴貞一潛懷逆
節輒肆狂謀傷痕旣深已及危革萬機不可以久曠四海
不可以乏君神鼎所歸須有纘繼輝王祚幼彰岐嶷長實
端良哀然不羣予所鍾愛必能克奉丕訓以安兆人宜立

爲皇太子仍改名祝監軍國事於戲孝愛可以承九廟恭
儉可以安萬邦無樂逸遊志康寰宇百辟卿士佑茲沖人
載揚我高祖太宗之休烈

授張實段逸兼御史中丞勅

張實等忠勇冠時韜鈴出衆俊輕鵬鸞氣激風雲六奇之
妙術難偕三略之英謀有素拔山背水曾不遜於昔賢左
馬右人已無慙於今日但以中興啟運舉善從宜將激勸
於功庸合甄陞於義烈豈可尚淹憲省未副陟明宜進霜
威勉承光寵更觀後效勿替前勞

賜錢鏐勅

朕惟兵興以來人情厭苦苟有預備多免侵傷錢鏐能於本鄉建築城壘沉聞不擾蒸庶盡出軍行省閱奏章良用嘉歎宜依所奏者

賜錢鏐安衆營額勅

未息兵戈須依營寨錢鏐安人撫衆爰建危牆累有奏陳須賜營額宜以安衆爲務仍不致妨耕農牒至準勅者

平楊守亮等勅

夫勝殘去殺古聖之格言阜俗安人前王之令典逆賊楊

守亮楊復恭楊守信等結於黨援聚作奸邪謂天可欺謂神可罔言惟訕上既驗於無君動即謀人非因其有道枉殺元舅沈溺一家關節旄阻留恩命隔西川之貢奉絕數鎮之綱商欲使朝廷支費不充又遣藩方資糧有關擢髮不足以數罪糜軀未足以當辜萬姓脂膏苛斂作奉身之具一方丁壯盡驅爲不軌之兵以至夫不得耕婦不得織愁歎尋盈於道路瘡痍僅遍於鄉閭每切焦勞不忘頃刻昨者幸賴股肱重寄心膺元臣共興貔武之師盡破豺狼之窟今則烟塵頓息戈甲以寧成關堵之期用遂息肩之

泰得不去其前弊示以新恩爰興惻隱之心乃降優宏之命應興元界內及洋州金商等州兵火傷殘之後各委長吏切加安存至於賦稅並宜酌量矜減其雜色差役悉仰權停如有百姓軍人前資見任凡百詿誤一切不問其京畿界內有兵馬屯駐之處亦委京兆府量宜蠲免俾令通濟無令重傷疲瘵其鳳翔邠寧秦州東川華商等道將士等二年于役苦戰摧凶竟於蕩平寧忘酬獎應立功大將節級等各委本道節度使定其功狀具名銜聞奏當議處分又飛輓之勞宴賞之費盡出方面不在朝廷誠曰嘉謀

亦由協力應用軍已來本判官并主掌官吏各仰分析奏聞各與獎拔於戲王者爲心不忍一物失所君人御宇豈忘四海爲家全資有土之臣共廣無私之化布告中外咸使聞知

答錢鏐奏進安衆營圖勅

錢鏐押衙王高至省所進版築茆山安衆營圖一面事具悉卿茂績勤王功深守土動惟有備居必思危以數邑之地里稍遙慮外寇之窺覷爲患爰興版築式固金湯況力役自盡於介夫勞擾豈問於黔首尋則隣封充斥果使衆

庶保安旣彰先見之明復有及人之利閱其繪事實驗長才豈惟列在縑緗固可垂於簡素嘉歎之極寐興不忘想宜知悉冬寒卿比平安否遣書指不多及

賜新及第進士勅

高宗夢傳說周文遇子牙列位則三公弼諧則四輔朕纂承鴻緒克紹寶圖思致理平未臻至化今大朝方興文物須擇賢良冀於僉選之間以觀廊廟之器今年新及第進士張貽憲等二十五人並指揮取今月九日於武德殿祇候委中書門下準此處分仍付所司

覆試進士勅

朕自君臨寰海八載於茲夢寐英賢物色巖野思名實相符之士藝文具美之人用立於朝庶裨於理且令每歲鄉里貢士考覈求才必在學貫典墳詞窮教化然後升於賢良之籍登諸俊造之科如聞近年已來茲道寢壞鷄多披於隼翼羊或服於武皮未聞一卷之師已在遷喬之列永言其弊得不以懲昨者崔凝所考定進士張貽憲等二十五人觀其所進文書雖合程度必慮或容請託莫致精研朕是以召至前軒觀其實藝爰於經史自擇篇題今則比

南郭之竿音果分一一慕西漢之辭彩無愧彬彬旣鑒妍
媼須有升黜其趙觀文程晏崔賞崔仁寶等四人才藻優
贍義理昭宣深窮體物之能曲盡緣情之妙所試詩賦辭
藝精通皆合本意其盧瞻韋說封渭韋希震張蟻黃滔盧
鼎王貞白沈崧陳曉李龜禎等十一人所試詩賦義理精
通用振儒風且躡異級其趙觀文等四人并盧瞻等十一
人並與及第其張貽憲孫溥李光序李樞李途等五人所
試詩賦不副題目兼句稍次且令落下許後再舉其崔礪
蘇楷杜承昭鄭稼等四人詩賦最下不及格式蕪顚頗甚

曾無學業敢竊科名浼我至公難從濫進宜令所司落下
不令再舉其崔凝爵秩已崇委寄殊重司吾取士之柄且
乖慎選之圖辜朕明恩自貽伊咎委中書門下行勅處分
奏來其進士張貽憲等二十四人名準此處分賜陸扆馮
渥銀器分物其落下舉人並賜絹三匹

貶崔凝合州刺史勅

國家文學之科以革隋弊歲登俊造委之春官蓋欲華實
相符爲第一用近寢訛謬虛聲相高朕所以思得貞正之
儒以掌其事而聞刑部尚書知貢舉崔凝百行有常中年

無黨學窺典奧文瞻菁英洎遍踐清華多厯年數累更顯
重積爲休聲遂輟其憲綱任之文柄宜求精當稍異平常
朕昨者以聽政之餘偶思觀閱臨軒比試冀盡其才及覽
成文頗多蕪類豈宜假我公器成彼私榮旣觀一一之吹
盡乏彬彬之美且乖朕志宜示朝章尚遵舍垢之恩俾就
專城之任勉加自省勿謂無恩可貶合州刺史

升華州爲興德府勅

有虞氏之爲君始言省狩周襄王之告難乃曰出居或肆
覲於他邦或播遷於近服然則地圖之內車轍所臨備庶

官而取象拱辰入九貢而以時述職是云守宇皆可建都
昔者德祖省方平戎服國外漢中之列郡同諸府以正名
藩翰之光典章實重朕越在關輔屢經歲時苟寬失馭之
憂蓋獲視朝之所鎮國軍節度使韓建始者星馳感憤雪
涕奉迎邀天力以來同激人情而共固以茲駐蹕安類覆
孟邑無夜犬之驚野有春耕之樂今則元龜告吉六馬將
還望山河而信是金湯顧宮室而若無風雨眷言至此我
實懷之俾慰衆心爰遵故事宜改爲興德府其所置官員
資望一切與五府同鄭縣升爲次赤諸縣爲次畿其將校

等並賜華州安蹕功臣

賜鎮東軍押衙樂仁厚勅

鎮東軍節度使左押衙充明州都押衙銀青光祿大夫檢校刑部尚書兼御史大夫上柱國持節辯州軍事樂仁厚居總大藩之萬里出揚阜俗之雙旌況辯州昭五嶺之衝南浦控三峽之要俾爾勲忠列於奏薦隼飛萬里熊耀雙旂右副爾知同安疆域故勅

答錢鏐奏重修天柱觀勅

省所奏進重修建天柱觀圖一面事具悉我國家襲慶仙

源遊神道域普天之下靈跡甚多然自兵革薦興基址多
毀況茲幽邃豈暇修營卿考一境圖經知列聖崇奉親臨
勝概重葺仙居仍選精慤之流虔備焚修之禮冀承元貺
來佑昌期豈惟觀好事之方抑亦驗愛君之節旣陳章奏
披翫再三嘉歎無已想宜知悉冬寒卿比平安好遣書指
不多及

誅王搏勅

王搏材類蕭葦器劣瓶筍秉鈞無數於時情畜志常多於
姦計結朋豎黨蠹物害公包聚貨財肥濃私室管領官職

贍濟一門雖行降黜之寬恩未塞衆心之忿怨須歸極典
方正朝章宜令所在賜自盡